



Svjedok Tužilaštva BiH tvrdi da je vidio optuženog Srpka Pustivuka i još nekoliko svojih komšija kako idu prema kući u selu Gornja Bioča (općina Ilijaš), u kojoj su, prema optužnici, ubijena dva civila, a nekoliko njih ranjeno. "Tog jutra, 29. maja, vidio sam Srpka zajedno s još otprilike desetak vojnika kako idu prema kući mojih komšija Bošnjaka. Ubrzo su se čule pucnjava i jake detonacije... Sutradan sam saznao da su ubijeni taj moj komšija i njegov sin, koji je tada imao između 17 i 19 godina", ispričao je svjedok Nermin Durmo.

Tužilaštvo BiH tereti Srpka Pustivuka da je kao pripadnik Stanice javne bezbjednosti (SJB) Ilijaš, s drugim pripadnicima vojske i policije Srpske Republike BiH, 29. maja 1992. godine, ili približno tog datuma, u selu Gornja Bioča učestvovao u napadu na civile, među kojima je bilo i djece. Prema optužnici, tom prilikom je ubijeno dvoje, a teško su ranjena tri civila.

Pustivuku se na teret stavlja i učešće u hapšenju i zarobljavanju civila Bošnjaka, koji su potom odvođeni u druge logore i objekte za zatočenje.

Svjedok je rekao da je odmah nakon prolaska naoružanih vojnika prema kući njegovog komšije, pobjegao u obližnju šumu. Kaže da je u šumi sreo grupu ljudi s kojom je htio da prebjegne prema Sarajevu, ali ih je na samom "prelazu na brdu Trešnjica" zaustavila pucnjava i on je ranjen.

Potom se, tvrdi svjedok, vratio u selo, gdje se zajedno s nekoliko komšija predao "Srpku i Neđi Ikoniću", naglasivši kako su njih dvojica bili "pitani za sve, jer su bili specijalci".

"Čim su vidjeli da sam ranjen, odveden sam u Dom zdravlja u Ilijašu. Tamo su me previli, a potom sam odveden u stanicu policije, gdje me je nepoznat policajac ispitivao i tukao skoro tri sata", kazao je Durmo.

Iste večeri, tvrdi svjedok, iz policijske stanice ga je izveo Ikonić, koji mu je zajedno sa Srpkom "obezbijedio" odlazak u Visoko.

"Spasili su mi život i ja im se zahvaljujem, ali istovremeno žalim za preko 40 Biočana koji su stradali u ratu. Trebali su i moj život uzeti", kazao je Durmo plačući u sudnici.

Neđo Ikonić je optužen pred Sudom BiH zajedno s Duškom Jevićem, Goranom Markovićem i Mendeljevom Đurićem za genocid počinjen u Srebrenici. Prema optužnici, Ikonić je bio komandir čete Centra za obuku na Jahorini Specijalne brigade policije Republike Srpske.

Svjedok je rekao da je iz Visokog hitno prebačen u bolnicu u Zenici, gdje je nakon nekoliko

dana sreo svoju komšinicu iz Gornje Bioče, zaštićenu svjedokinju S4.

“Ta djevojčica od 12 godina ležala je jer je imala fiksator na nozi. Kroz plač mi je ispričala da ju je ranio Srpko Pustivuk. Kada sam ponovio njegovo ime, počela je da vrišti. Bila je vidno uplašena”, ispričao je Nermin Durmo.

Na suđenju je trebao biti saslušan još jedan svjedok Tužilaštva, ali je o njegovim mjerama zaštite raspravljano bez prisustva javnosti.

Naredno ročište zakazano je za 6. juni 2011. godine.

BIRN Justice Report

[Preuzeto sa www.ilijas.ba](http://www.ilijas.ba)